

Pressecommuniqué 2.3.2018 14:30

De Wee2050 huet d'Iddi vun der ADR fir Kandidaten op hir Lëscht ze schécken acceptéiert.

D'Zukunft vun der lëtzebuenger Sprooch mat engem richtegen Gläichgewicht tëscht dem Däitschen, Engleschen a Franséischen, wéi och den onkontrolléierte staarken Wuesstem, sinn an enger Zäit vu Wiessel, déi zwee wichtegste Themen fir d'Zukunft vun eisem Land.

Mir wëssen datt et net duer geet, nëmmen op de soziale Medien eng staark Präsenz ze weisen, de politeschen Debat mat ze bestëmmen a gutt Argumenter anzubringen. Déi richteg Decisiounen ginn an den Nationalwahlen, an der Chamber an an der Regierung gemaach. Duerfir war et fir eis extrem wichteg bei de Parteien e Partner ze fannen.

Eist Land brauch eng staark alternativ Stëmm, déi eis Themen a Vuen aus der politescher Mëtt opgräift a gläwderg, a virun allem éierlech, vertritt. D'ADR ass un eis erugetrueden an huet eis offéiert Kandidaten aus eisen eegene Reien op hir Lëscht ze stellen. Mir hunn déi Invitatioun acceptéiert. Am Géigenzuch bidde mir eis Kompetenz an de soziale Medien, op där mir déi gréisste Präsenz wäit virun der CSV an de Gambia-Parteien hunn, un.

De Wee2050 huet sech virun dräi Joer, am Virfeld vum Referendum, ënnert dem Numm Nee2015 gegrennt. Zu deem Zäitpunkt gouf et eng Ëffentlechkeet, an där kee fairen an equilibrierten Debat méiglech war. Mir hu fréi erkannt, datt et nawell méiglech ass, mat Hëllef vun de soziale Medien eng kloer a staark Stëmm an der Ëffentlechkeet ze schafen. Och um Terrain hu mir gewisen, datt mir bei de Leit present sinn. Trotz dem massiven Apparat fir de Jo aus Parteien, Medien, Gewerkschaften, Patronatsvertriedungen, Wirtschaft, Kënschtler an ASTI, iwweralls meeschtens iwwer de Kapp vun hiren eegene Memberen ewech, hu mir et deemools fäerdeg bruecht, dem Nee Gehéier ze verschafen an d'Leit waakreg ze maachen. D'Resultat vum 7. Juni 2015 war méi wéi kloer. D'Land war net an der Mëtt an Zweek gespléckt, mee eng däitlech 80%, d'Mëtt vun der Gesellschaft, hat Nee zum Ausländerwahlrecht gesot. D'Jo-Lager war an der extremer Minoritéit.

Nom Referendum huet de Wee2050 mat ganz vill Asaz weider gemaach, fir Themen aus der politescher Mëtt opzegräifen. Petitiounen goufen ënnerstëtzt. Mir hunn och op d'Gefor higewisen, datt d'Ausländerwahlrecht duerch dat nei Nationalitéitgesetz mat Erossetze vun de Sproochkenntnisser op bal Null, duerch d'Hannerdier agefouert kéint ginn. Mir sinn enttäuscht, datt mat der Erossetzung vun den Sproochkenntnisser, d'CSV mat der Gambiaregierung sech géint déi politesch Mëtt gestallt huet. Mir stelle fest, datt ganz vill Nei-Lëtzebuenger net wierklech Lëtzebuergesch schwätze kënnen, an domat nëmme kënschtlech integréiert gi sinn. Esou eng Politik kann nëmmen zu gesellschaftleche Spannungen féieren!

Eis Ziler goufen am August 2015 festgeluecht: De Wee2050 setzt sech fir d'lëtzebuenger Sprooch, fir eng richtegen Méisproochegkeet, a fir en méi luesen an verstännege Wuesstem an, dat sachlech a fair, awer och bestëmmt! Eis Ziler fannt Dir hei ënnen drënner.

E puer Wierder zu eiser Kooperatioun: De Wee2050 huet sech d'Parteiprogrammer vun den eenzele Parteien ugekuckt, a fënnt datt d'ADR am nooste bei de Wee2050-Ziler iwwert d'Sprooch, de Wuesstem an d'Demokratieverständnës ass, a se éierlech, staark a glafwierdeg vertritt. Selbstverständlech betrëfft eis Ausso haaptsächlech déi Themen, déi an eisen Ziler behandelt ginn. Mee et ass selbstverständlech och kloer, datt Kandidaten aus de Reie vum Wee2050 och zum ganzen ADR-Parteiprogramm stoe wäerten.

De Wee2050 ass am Gaang eng Rei vu Kandidaturen ze diskutéieren. Et steet awer scho fest datt de Fred Keup, Grënner a Spriecher vum Wee2050, sech als Kandidat zur Verfügung stellt. Aner Kandidate gi méi spéit an Ofsprooch mam ADR annoncéiert.

d'Initiativ *Wee2050*
Mail: kontakt@wee2050.lu

Eis Ziler (allgemeng festgeluecht am August 2015)

1. D'lëtzebuenger Sprooch ass déi gemeinsam Sprooch vun alle Lëtzebuenger an duerfir essentiell fir eng voll Integratioun.

- 1.1. Géint d'Erofsetze vum Sproochenniveau fir déi duebel Nationalitéit.
- 1.2. Fir déi Auslänner, déi Lëtzebuergesch kënnen, sollen d'Prozedure fir d'Nationalitéit ze kréien, vereinfacht ginn.
- 1.3. Eng besser Integratioun duerch méi Sproochecoursen.
- 1.4. Organisatiounen, déi sech fir d'Integratioun asetzen, ënnerstëtzen.
- 1.5. Méi Ënnerstëtzung fir d'Veräiner, déi eng wäertvoll Integratiounsarbeit mat auslännesche Kanner a Jonke maachen.

2. D'Lëtzebuenger Sprooch muss am Alldag nees vill méi präsent sinn.

- 2.1. D'lëtzebuenger Sprooch muss prioritär op den Internetsäite vu Gemengen a Staat, Stroosseschëlter a Panneue präsent sinn
- 2.2. D'Lëtzebuenger Sprooch soll op EU Niveau unerkannt ginn.
- 2.3. D'Verfassung soll op Lëtzebuergesch sinn, an d'Gesetzer solle sou wäit wéi méiglech och op eng aner Sprooch iwwersat ginn.
- 2.4. Datt een hei am Land liewen a schaffe kann, mat Däitsch oder Englesch, ouni zwéngend Franséisch mussen ze kënnen (All Formulaire vun den Administratiounen sollen och op Lëtzebuergesch oder Däitsch zur Verfügung gestallt ginn, déi wichtegst och op Englesch). Sou kéinten d'Auslänner sech éischer op déi lëtzebuenger Sprooch konzentréieren.
- 2.5. D'lëtzebuenger Kultur (Konscht, Traditiounen, Geschicht, Patrimoine) muss gefërdert ginn.

3. De lëtzebuergesche Schoulsystem muss als beschten Integratiounswee promovéiert ginn.

- 3.1. Den auslännesche Matbierger kloer maachen, datt hir Kanner nëmmen a lëtzebuergesche Schoule voll integréiert ginn.
- 3.2. Lëtzebuergesch muss an alle staatlech ënnerstëtzte Schoulen zu Lëtzebuerg, wéi de Lycée Vauban oder ISL (International School), ugebuede ginn.
- 3.3. An de staatlech ënnerstëtzte Crèche muss Lëtzebuergesch geschwat ginn.
- 3.4. Am Précoce an an der Spillschoul soll d'Fërderung vum Lëtzebuergeschen am Mëttelpunkt stoen a keng weider Friemsprooche geléiert ginn.

4. Nei Weeër goe fir der politescher Mëtt eng Stëmm ze ginn.

- 4.1. Fir méi direkt Demokratie a fir eng Méiglechkeet fir e Referendum oder en 2. Vote zu engem bestëmmte Gesetz unzufuerderen.
- 4.2. Kritesch Themen, déi net genuch an der Ëffentlechkeet diskutéiert ginn, uschwätzen.
- 4.3. Duerch den Asaz vum Internet, d'Leit méi an den demokratesche Prozess abannen.

5. Fir en nohaltegen, kontrolléierte Wuesstem bis 2050

- 5.1. De Wuesstem deen op e staarkt Zouhuele vun der Immigratioun an de Grenzgänger baséiert, thematiséieren.
- 5.2. D'Konsequenze vum Wuesstem op eis Liewensqualitéit diskutéieren (z.B. Wunnengsnout, Verkéierschaos, Ëmweltproblemer, a Verbauung).
- 5.3. D'Käschte vun neier Infrastruktur fir de Staat thematiséieren (z.B. nei Autobunnen, Schoulen, Staatsbeamten, Waasserversuergung an Spideeler).